

Akiitsunut aningaasaliinernullu periusissaq 2012**Saqqummiussissut**

(Aningaasaqarnermut Naalackersuisoq)

Siullermeerinnineq

Inatsisartuni maani tamatta nunarput sinnerlugu annertuunik anguniagaqarpugut. Siuariaateqarnissaq tamatta kissaatigaarput, taamaattumillu aningaasaatitta sumut atorpeqarnissaannut pitsaasunik isumassarsiarpassuaqarpugut. Isumassarsiallu taakku tamarmik pitsaasuusinnaapput. Tamaasali aningaasassaqartinngilagut. Taamaattumik pingaarnersiuisariaqarpugut.

Pingaarnersiuiineq tamanna sukumiisumik piareersaaneq tunngavigalugu ingerlanneqassaaq, taamaalilluta aningaasaliinerit pingaarnersiukkatta inuiaqatigiinnik atugarissaartunik kinguaariinnullu tulliuuttunut aningaasaqarnermik isumannaatsumik qulakkeerisinnaaqulluta.

Pisortanut akiitsut tutsuiginartumik sinaakkusersornerisigut patajaatsumik ineriartortitsinissamut tunngavissinissaq siunertaralugu Akiitsunut aningaasaliinernullu Periusissamik Naalackersuisut ullumikkut saqqummiussaarpugut, tamatumani Kalaallit Nunaat aningaasaliiffigissallugu patajaatsuusoq, qularnaatsuusoq imminullu akilersinnaasoq nunarsuarmioqatitsinnit tutsuigineqassalluni.

Periusissamik pisortat sanaartornermut aningaasaliinerinik tamanik katersuuffiusumik aatsaat saqqummiussisoqarpoq. Tamatumani pineqarput Namminersorlutik Oqartussani, kommunini aammalu ingerlatseqatigiiffinni Namminersorlutik Oqartussanit pigineqartuni sanaartornerit.

Periuseq atorlugu kikkut tamarmik assigiimmik sammivilimmik iliuuseqarnissaannut periarfissaqalissaaq. Aatsaat ataatsimut suliniuteqarnikkut pitsannguutissat pisariaqartinneqartut pilersinneqarsinnaapput. Inuiaqatigiinni naligiinngitsoqarnera annikillisarniarutsigu aammalu aningaasaqarnikkut politiki attanneqarsinnaanngitsoq pinngitsoortinniarutsigu allannguinnissaq pisariaqarpoq. Periusissaq ullumikkut saqqummiunneqartoq inuit ataasiakkaat inuiaqatigiillu ataatsimut isigalugit ineriartornermik isumannaatsumik pilersitsiniarluni siunissami iluarsartuussinissanut tunngavissat ilagaat. Periusissami tassani pisortat aningaasaliisarneri aallunneqarput anguniakkanillu pingaarnernik pingasunik imaqarluni.

Siullertut pisortat akiitsuinut tamarmiusunut sinaakkutissanik pilersitsinissaq Naalackersuisut kissaatigaat. Taamaaliornikkut aamma piffissani ajornartorsiorfiusuni atugarissaarnermut aningaasaliissutigut annikillisannikkaluarlugit taarsigassarsiatta utertillugit akilerneqarsinnaanissaat qulakkiissavarput. Nunani tamalaani ineriartorneq eqqarsaatigalugu pisortat missingersuutaasa nunatsinni innuttaasut qinigaannit pinnani allanit aalajangiiffigisalerneqarnissaasa pinngitsoortinneqarnissaanik qulakkeerinnissaq Naalackersuisut kissaatigaat.

Tamatuma peqatigisaanik akiitsornissamut tunngavissaritat saqqummiunneqartut pisortat akiitsuisa tamarmiusut ineriartornerisa ersarissuunissaat qulakkiissavaat. Tamanna pissaaq Aningaasaqarnikkut ingerlatsineq pillugu Nalunaarummi ukiumoortumik

nalunaarusiortarnikkut, tamatumani kommuni aammalu ingerlatseqatigiiffiit anginerit Namminersorlutik Oqartussanit pigineqartut ilaatinneqassallutik. Pisortat aningaasaliisarnerisa akiitsunut tamarmiusunut sunniutaasa malinnaavigineqarnissaat pisariaqarpoq aammali pisortat aningaasaliinerisa angusaqarnissamut inuiaqatigiillu assigiimmik siunnerfeqarnissaannut tapeeqataanissaa taamatulli pingaaruteqarpoq.

Pingaarnersiunerimi tunngavissat sisamat pingaarutillit suliniutinik naliliinerimi atugassat periusissami saqqummiunneqarput: Suliniutit tamarmik aningaasaqarnikkut pilersaarummik ilaqartinneqassapput, tassani takutinneqassalluni aningaasaliineq ataatsimut isigalugu inuiqatigiinnut iluanaarutaassasoq aammalu siunissami innuttaasut atugarissaarnissaannut aningaasartuutitut aningaasaliissut annikillisaataassasoq. Inuiaqatigiit isumaginninnikkut avatangiisitigullu isumannaatsut pilersinneqassasut Naalakkersuisut kissaatigaat. Taamaattumik pisortat aningaasaliisarneri tunngavissat taakku malillugit aamma nalilersorneqassapput. Immikkoortoq periutsimi immikkut erseqqissaatigineqartoq tassaavoq aningaasaliinerit nutaat tamarmik ingerlaavartumik malinnaaffigineqarlutillu iluarsivigineqartassasut. Malinnaanissamut iluarsiiisutissanullu piffissaagallartillugu aningaasanik immikkoortitsisimasuugutta ullumikkut inissiat taama amerlatigisut isaterneqarnissaat pisariaqarsimassanngikkaluarpoq.

Nuna tamakkerlugu sanaartornermut pilersaarutissatut siunnersuummik Aningaasaqarnermut Ataatsimiititaliap isumaliutissiissummini kingullermi ujartugaanik periuseq aamma imaqarpoq. Sanaartornermut pilersaarummi aallaavigineqarpoq ilinniartitaanermut tunngasuni suliniutit Naalakkersuisunit annertusarniarneqarmata. Ilinniartitaaneq pitsaanagerusooq inuit ataasiakkaat inuiaqatigiillu pitsaasumik ineriartornissaannut tunngavissaavoq. Taamaattumik suliassaqarfik tamanna Naalakkersuisunit sunniuteqarluartumik sulissutigineqassaaq. Ineqarnermut tunngasuteqartut suliassaqarfivoq alla annertuumik pingaartitarpur. Nuttarsinnaanermut tunngatillugu 2010-mi misissuinerit takutippaat, innuttaasut najugaqarfinnut suliffissagissaarnerusunut nuukkusussuseqartut. Ineqarnermut tunngasuni ajornartorsiutit aaqiivigineqarnissaat Naalakkersuisut kissaatigaat. Inissiaq pitsaasoq ilaqutariit tamarmik pisariaqartippaat aammalu ilaqutariit nunap immikkoortuinut suliffissagissaarnerusunut ilinniarnissamullu periarfissagissaarnerusunut nuutsinniarutsigit pitsaasumik ineqartinneqarsinnaanissaat pisariaqarpoq. Aningaasartuutit taamaattut aningaasanut inatsimmi ingerlaavartumik aningaasartuutit siunnerfilimmik pingaarnersiunerisigit aningaasalersorneqassapput.

Angallanneq pillugu isumalioqatigiissitap isumaliutissiissutini 2011-mi saqqummiuppa. Periusissaq tamanna aqutigalugu suliniutit ingerlateqqinneqartussat Naalakkersuisut sulissutigeqqissavaat pingaarnersiussallugillu.

Periusissaq tamanna aqutigalugu pisortat aningaasaliisarnerinut ataatsimut pilersaarut Naalakkersuisut saqqummiuppaat. Aalajangigassat inuiaqatigiinnut pingaarutillit pineqarput aammalu Inatsisartut oqallinnissaannut tunngaviussallutik. Periusissaq tamanna atorlugu inuiaqatigiit aningaasaqarnikkut isumannaatsumik ingerlallutik pitsaasumik ineriartornissaannut tunngavissiissaagut.